

21 OCT 2000

Ungku-debat

UNGKU AZIZ TUNGGU MASA SESUAI BUAT KEPUTUSAN JADI MODERATOR DEBAT

KUALA LUMPUR, 21 Okt (Bernama) -- Prof Diraja Ungku A. Aziz berkata beliau akan membuat keputusan sama ada bersetuju atau tidak menjadi moderator debat antara Ketua Pemuda Umno dan Ketua Pemuda Pas apabila "sampai masanya".

"Seperti saya kata, kita kena ikut kata Napoleon Bonaparte, "cross the bridge when you come to it".

"Apabila sampai masanya, saya akan membuat keputusan," katanya kepada pemberita ketika ditanya sama ada beliau bersetuju atau tidak menjadi moderator debat antara Ketua Pemuda Umno Datuk Hishammuddin Tun Hussein dan Ketua Pemuda Pas Mahfuz Omar.

Bekas Naib Canselor Universiti Malaya itu menjadi tetamu pada Kolokium Pemuda Umno mengenai pencapaian 30 peratus ekuiti Bumiputera. Ia berlangsung di Pusat Dagangan Dunia Putra (PWTC) di sini hari ini.

Ungku Aziz yang juga Yang Dipertua Angkatan Koperasi Kebangsaan Malaysia Berhad (Angkasa) ialah antara beberapa nama yang disebut akan diundang menjadi pengantara dalam debat berkenaan, yang tarikh dan tempatnya belum ditetapkan.

Katanya beliau belum menerima sebarang surat jemputan dan hanya tahu mengenai perkara itu menerusi akhbar.

"Awak kena tunggu...Datuk Hishammuddin akan membuat satu kenyataan dan Mahfuz juga akan membuat kenyataan, dan kamu akan tahu," katanya.

Baru-baru ini Hishammuddin berkata debat itu akan diadakan bulan depan tetapi tarikh sebenar dan tempat perdebatan itu belum diputuskan.

Perdana Menteri Datuk Seri Dr Mahathir Mohamad bersetuju supaya debat itu diadakan.

Ketika ditanya mengenai pendapat beliau tentang debat itu, Ungku Aziz berkata debat memang baik tetapi ia bergantung kepada pembahasnya.

-- BERNAMA

APG GM MAI